

Grond sustegn per la piazza aviatica da Samedan

■ **(anr/fa) Unanimamain ha approvà il cussegl grond la nova organisaziun da la pli auta piazza aviatica da l'Europa. Quella avevan acceptà d'atun passà era las votantas e votants da l'Engiadin'Ota cun 80 pertschient da las vuschs.** La piazza aviatica a Samedan sin 1'707 meters sur mar è il pli aut eroport en Europa. El vegn dovrà surtut per sgols da salvament, per svols d'affar e surtut per svols turistics. «La piazza sa chatta en il center dad ina da las pli grondas destinaziuns turisticas da la Svizra ed è uschia da gronda impurtanza per il turissem chantunal», ha ditg il president da la cumissiun predeliberanta *Roger Vetsch* (pbd, Claustra). L'eroport a Samedan è in impurtant patrun da lavur: «El porchia 37 plazzas da lavur cumplainas, ensem cun ils collavuradors da las firmas che s'han qua stabilidas sco Rega, Heli

Bernina etc. lavuran qua var 100 persunas.» Cur ch'il chantun aveva declerà d'avair l'intenziun da vender la piazza aviatica a l'Engadin Airport AG (EA) ha ja dà opposiziun da differentas varts: Abitants en la regiun avevan tema che la piazza aviatica vegniss engrondida fermamain.

Circul Engiadin'Ota survegn pled en chapitel

«Il concept che la grupp da lavur incumbensada ha elavurà prevesa da separar la gestiun e l'infrastructura», ha declerà Vetsch. L'Infra, ina societad autonoma da dretg public sut la direzziun dal circul Engiadin'Ota dat cun in mandat da prestaziun a l'EA l'incumbensa da gestir la piazza aviatica a Samedan. Il chantun che posseda gia grondas parts dal terrain da l'eroport vegn a cumprar da l'EA

las ulteriuras parcelas ed edifizis e metter a disposiziun quellas a l'Infra cun dretg da construcziun per ils proxims 40 onns. Grazia a quest concept survegn il circul en avegnir in pled en chapitel en quai ch'i riguarda eventuals projects d'engrondir la piazza. «Il chantun vul sa participar ad investiziuns ch'èn necessarias per mantegnair la concessiun, sco p. ex. l'atterrament cun agid dad instruments», ha ditg il president da la cumissiun. Ins fa quint cun custs da var otg milliuns francs, dals quals il chantun vul suprender dus milliuns, cun la cundiziun ch'il circul surprendia quatter milliuns francs. Dus ulteriurs milliuns empresta la confederaziun. Cun 113:0 vuschs e naginas abstenziuns da la vusch ha approvà il cussegl grond quest affar politic. Uschia è se girà l'avegnir da la piazza aviatica da Samedan.



Il concept che la grupp da lavur incumbensada ha elavurà prevesa da separar la gestiun e l'infrastructura sin la piazza aviatica a Samedan.